

20 MAR 2004

Pilihan raya-pengundian/I

RAKYAT MALAYSIA MENGUNDI ESOK DENGAN BN DIJANGKA RAIH MANDAT BESAR

Oleh: Ahmad Zukiman Zain

KUALA LUMPUR, 20 Mac (Bernama) -- Rakyat Malaysia keluar mengundi esok

pada pilihan raya umum ke-11, dengan Barisan Nasional selaku parti memerintah diramal memperolehi mandat besar bagi kepimpinan baru Perdana

Menteri Datuk Seri Abdullah Ahmad Badawi.

Parti gabungan 14 komponen itu meminta 10.28 juta pengundi daripada

penduduk seramai 23 juta supaya memberikan Abdullah, yang mula memegang

jawatan berkenaan empat bulan lepas, dengan mandat yang kukuh untuk tempoh

lima tahun akan datang sebagai sokongan terhadap program dan dasar beliau

yang mengutamakan rakyat.

Sebanyak 7,300 pusat mengundi terutamanya sekolah serta dewan dan balai

raya, akan dibuka dari 8 pagi hingga 5 petang esok.

Sebanyak 202 kerusi parlimen dan 493 kerusi negeri

dipertandingkan,

kebanyakannya melibatkan persaingan satu lawan satu antara BN dan parti

pembangkang utama -- PAS, DAP dan Parti Keadilan Nasional.

BN mencatatkan permulaan yang memberangsangkan pada hari penamaan calon

Sabtu lepas, dengan memenangi 14 kerusi parlimen dan tujuh kerusi negeri

tanpa ditandingi.

Ia mendapat tiga lagi kerusi parlimen dan empat kerusi negeri apabila

calon-calon lawan menarik diri dalam tempoh tiga hari yang dibenarkan.

Kejutan berlaku di Johor apabila PAS mendapat satu kerusi Dewan Undangan Negeri pada hari penamaan calon setelah seorang calonnya menang

tanpa bertanding, menghalang peluang BN menyapu bersih negeri kelahiran

Umno itu.

Abdullah, yang mengetuai BN pertama kalinya pada pilihan raya umum

selepas mengambil alih tampuk pemerintahan daripada Tun Dr Mahathir Mohamad, merayu pengundi supaya keluar beramai-ramai untuk mengundi pada

pilihan raya umum di alaf baru ini.

Oleh kerana hari mengundi esok jatuh pada hari yang dengan dengan

perlumbaan Grand Prix Formula One Malaysia, Menteri Pengangkutan Datuk Seri Chan Kong Choy menasihatkan mereka yang berhasrat untuk menonton perlumbaan itu di Sepang supaya keluar mengundi dahulu sebelum ke litar berkenaan.

Terdapat 200,000 undi pos terdiri daripada 113,000 undi daripada Angkatan Tentera, 83,000 daripada polis dan 2,500 diplomat dan pelajar di luar negara.

Pengundian pos di peringkat angkatan tentera diadakan selama tiga hari berakhir hari ini.

Cuaca diramal cerah di seluruh negara pada sebelah pagi manakala Sabah dan Sarawak akan mengalami hujan sementara di satu dua tempat pada tengah hari.

Suruhanjaya Pilihan Raya (SPR) berharap jumlah mereka yang keluar mengundi mencapai 90 peratus berbanding antara 70 dan 75 peratus pada pilihan raya yang lepas.

Menurut SPR, daftar pemilih telah dibersihkan dan nama-nama pengundi yang meninggal dunia telah dikeluarkan.

Abdullah, yang mempertahankan kerusi parlimen Kepala Batas yang disandangnya sejak 1978, dicabar oleh Abdul Khalid Rasid dari PAS.

Di Pekan, Timbalan Perdana Menteri Datuk Seri Najib Tun Razak juga berdepan dengan seorang calon PAS iaitu Brig Jen (B) Datuk Zakaria Dahlan manakala Presiden MCA Datuk Seri Ong Ka Ting menghadapi tentangan Tan Hang Meng, calon DAP di kawasan parlimen baru, Tanjung Piai di Johor.

Presiden MIC Datuk Seri S.Samy Vellu mempertahankan kerusi parlimen Sungai Siput dalam pertandingan tiga penjuru melibatkan S.Ponmugam dari DAP dan Dr D.Jeyakumar dari Keadilan.

Presiden Gerakan Datuk Seri Dr Lim Keng Yaik dicabar calon DAP, Nga Hock Cheh dalam usahanya untuk mengekalkan kerusi parlimen Beruas di Perak.

Di pihak pembangkang, Presiden PAS Datuk Seri Abdul Hadi Awang bertemu sekali lagi dengan Datuk Abdul Rahman Bakar, calon BN bagi mempertahankan kerusi parlimen Marang.

Pengerusi DAP Lim Kit Siang pula mencuba nasib untuk kembali ke parlimen dengan mencabar penyandang Thong Fah Chong dari BN bagi kerusi

Ipoh Timor.

Presiden Keadilan Datin Seri Dr Wan Azizah Ismail dicabar di Permatang Pauh oleh bekas Imam Besar Masjid Negara Datuk Pirdaus Ismail, calon BN.

SPR menjangka keputusan pertama diketahui pada 7.30 malam, dengan beberapa kerajaan negeri boleh dibentuk menjelang 10 malam.

Kira-kira 56,000 anggota polis akan ditugaskan di seluruh negara bagi menjaga keamanan dan keselamatan.

-- Bernama

AZZ AZZ NHD MAI